

VENDIM
Nr.80, datë 23. 10. 2009

PËR MIRATIMIN E MODELIT TE KONTRATËS SË SHITBLERJES SË ENERGJISË ELEKTRIKE NDËRMJET KESH SHA (FPSH) DHE PRODHUESVE TË VEGJËL TË ENERGJISË (PVE)

Në mbështetje të nenit 9 të ligjit nr.9072, datë 22.05.2003 “Për sektorin e energjisë elektrike”, të ndryshuar, pikës 4.13 germa “a” pika 5, të modelit të tregut të energjisë elektrike, pikës “V” të rregullave të tregut shqiptar të energjisë, miratuar me vendimin e Bordit të Komisionerëve nr. 68, datë 23.06.2008, nenit 25 të rregullave të praktikës dhe procedurave të ERE-s, Bordi i Komisionerëve të Entit Rregullator të Energjisë (ERE), në mbledhjen e tij të datës 23.10.2009, pasi shqyrtoi modelin e kontratës “Për shitblerjen e energjisë elektrike, ndërmjet KESH sh.a. (FPSH) dhe prodhuesve të vegjël të energjisë (PVE)”, të paraqitur nga grupi i punës,

VENDOSI:

1. Miratimin e Modelit të Kontratës së Shitblerjes së Energjisë Elektrike, ndërmjet KESH sh.a. (FPSH) dhe prodhuesve të vegjël të energjisë (PVE). (Kontrata bashkëlidhur këtij vendimi).
2. Çdo kontratë e lidhur midis KESH sh.a. (FPSH) dhe prodhuesve të vegjël të energjisë (PVE) para hyrjes në fuqi të këtij vendimi, do të jetë në fuqi deri në momentin e përfundimit të afatit të saj.
3. Ngarkohet Drejtoria e Licencimit dhe Monitorimit të Tregut për njoftimin e palëve.
Ky vendim hyn në fuqi menjëherë.
Ky vendim botohet në Fletoren Zyrtare.

KRYETARI I ERE-S
Bujar Nepravishta

KONTRATË
PËR SHITBLERJE TË ENERGJISË ELEKTRIKE NDËRMJET KESH SHA DHE
PRODHUESVE TË VEGJËL TË ENERGJISË ELEKTRIKE

E lidhur sot më datë ____ / ____ 20 në Tiranë, ndërmjet;
Shoqërisë _____, person juridik shqiptar, regjistruar në _____ me
vendim nr. _____ me nr. NIPT-i _____ me seli të shoqërisë _____, këtu
e më poshtë e quajtur “Shitësi”, përfaqësuar nga znj/z _____;
dhe

Korporatës Elektroenergjetike Shqiptare KESH sh.a. (Furnizuesi publik me shumicë),
person juridik shqiptar, regjistruar në Gjykatën e Rrethit Tiranë me vendim nr.12728, datë
6.11.1995, me seli të shoqërisë në bllokun “Vasil Shanto” Tiranë, këtu e më poshtë e quajtur
“Blerësi”, përfaqësuar nga znj/z _____;

Duke qenë se:

-Shoqëria _____, ka marrë me koncesion/ ka privatizuar, HEC-in/et
_____, sipas marrëveshjes së koncesionit/sipas kontratës së shitblerjes _____;

-Palët janë përgjegjëse për përmbushjen e detyrimeve sipas kësaj kontrate;

-ERE me vendim të saj nr. _____, datë _____, ka licencuar
shoqërinë _____ për prodhimin e energjisë elektrike;

-KESH sh.a. duhet të nënshkruajë një kontratë për blerjen e energjisë elektrike me
prodhuesit e vegjël të energjisë elektrike në zbatim të marrëveshjes koncesionare
_____, ligjit nr.9470, datë 2.2.2006 “Për një shtesë në ligjin nr.8527, datë

23.9.1999 “Për privatizimin e hidrocentraleve vendore”;

-ERE ka autoritetin të përcaktojë çmimin e shitjes së energjisë elektrike për prodhuesit e vegjël të energjisë.

Palët bien dakord si më poshtë vijon:

Neni 1 Përkufizime

Në këtë kontratë termat e mëposhtëm do të kenë kuptim si vijon:

Çmimi – do të thotë çmimi i shitblerjes së energjisë elektrike, i vendosur nga Enti rregullator i Energjisë sipas legjislacionit në fuqi.

Dita – do të thotë një periudhë kohore prej 24 orësh e cila fillon në orën 00.00 deri në 24.00.

Energjia elektrike ose energjia – nënkupton energjinë elektrike aktive dhe energjinë elektrike reaktive të transmetuar dhe të shpërndarë nga sistemi elektro-energjetik.

Energji elektrike aktive - është fuqia aktive që gjenerohet apo kalon në një qark elektrik gjatë një intervali kohe dhe përcaktohet nga integrali i caktuar i fuqisë aktive në kufijtë e kohës. Njësia matëse e saj është vat-orë ose shumëfisha të saj.

Energji elektrike reaktive – është integrali i caktuar me kufij kohe i fuqisë reaktive matur në njësi me volt- amper reaktive-orë ose shumëfisha të saj.

ERE – Enti Rregullator i Energjisë.

Frekuenca – numri i cikleve alternative të rrymës për sekondë, në të cilin funksionon sistemi elektroenergjetik;

“Forcë madhore” – është një ngjarje ose një akt natyror ose shoqëror që ndodh në vend, si tërmetet, ciklonet, rrufetë, përmbytjet, shpërthimet vullkanike, zjarret, lufta, konfliktet e armatosura, kryengritjet, aktet terroriste, të cilat pengojnë palën/palët kontraktuese të përmbushin detyrimet përkatëse sipas kësaj kontrate, si dhe akte ose ngjarje të tjera, të cilat janë jashtë kontrollit të mundshëm të palës/palëve dhe nuk ndodhin për faj të tij/tyre dhe pala/palët nuk është/janë në gjendje t’i eliminojnë ato, edhe pse ka/në ushtruar siç duhet aftësitë, përpjekjet dhe kujdesin e tij/tyre.

Defektet në pajisjet ose materialet ose vonesat për t’i bërë ato të disponueshme, konfliktet e punës, grevat ose problemet financiare nuk mund të kërkohej të konsiderohen nga palët si forcë madhore, përveç rastit ku burojnë nga një rrethanë e lidhur me forcën madhore.

Furnizues publik me shumicë ose FPSH – është personi i licencuar për blerjen e energjisë elektrike nga gjenerimi publik, nga PPE-të, PVE-të apo treguesit për shitjen te furnizuesi publik me pakicë.

Kontrata – kjo kontratë e nënshkruar për shitblerjen e energjisë elektrike, e lidhur midis prodhuesit të vogël të energjisë PVE (shitësit) dhe KESH (Furnizuesit publik me shumicë) FPSH (Blerësit), si dhe çdo shtesë apo amendim që mund t’i bëhet asaj në të ardhmen.

Ligj – Ligji nr.9072, datë 22.5.2003 “Për sektorin e energjisë elektrike, i ndryshuar.

Matës- d.m.th. një pajisje për matjen dhe regjistrimin e vlerave të matura të energjisë elektrike.

Marrëveshje tregu – një marrëveshje, e cila përmban rregullat e tregtisë dhe përgjegjësitë e palëve në marrëveshje sipas legjislacionit në fuqi.

Muaji – do të thotë periudha kohore e cila fillon në orën 00.00 p.d. të ditës së parë kalendarike të muajit dhe mbaron në orën 24.00 të ditës së fundit kalendarike të apo atij muaji.

Operator i sistemit të shpërndarjes – është personi juridik i licencuar, përgjegjës për operimin, mirëmbajtjen dhe zhvillimin e sistemit të shpërndarjes së energjisë elektrike.

Palë - Shitësi dhe Blerësi në këtë kontratë.

Pikë livrimi – Për efekt të kësaj kontrate, pika e livrimit do të jetë në zbarat dalëse të tensionit të mesëm të kabinës, apo të nënstacionit të impiantit prodhues.

Pikë matje – është pika e livrimit në të cilën sistemi i matjes plotëson të gjitha kushtet teknike dhe të saktësisë sipas kodit të matjes së energjisë elektrike dhe akteve të tjera nënligjore të miratuara nga ERE për këtë qëllim.

Prodhuës i vogël i energjisë elektrike/PVE ose prodhuës – do të thotë një person juridik i licencuar për të prodhuar energji elektrike të lidhur me sistemin e shpërndarjes sipas përcaktimeve të legjislacionit në fuqi.

Sistemi i matjes së energjisë elektrike ose sistemi i matjes – është tërësia e pajisjeve të matjes: matësi, automati, transformatorët e rrymës, mbrojtje e matësit dhe izolatorët, qarqet dhe pajisjet e ruajtjes së të dhënave, pajisjet e transmetimit dhe të komunikimit të të dhënave dhe lidhjet e nevojshme kabllore, të cilat janë pjesë e pajisjeve të matjeve të energjisë elektrike aktive dhe energjisë elektrike reaktive në objekt.

Viti – do të thotë periudha kohore e cila fillon në orën 00.00 të ditës së parë të vitit kalendarik dhe mbaron në orën 24.00 të ditës së fundit të po atij viti kalendarik.

Neni 2

Qëllimi i kontratës

2.1 Kjo kontratë përcakton termat dhe kushtet në të cilat blerësi do të jetë i detyruar të blejë, dhe shitësi do të jetë i detyruar të shesë të gjithë energjinë elektrike të prodhuar nga shitësi si prodhuës i vogël i energjisë elektrike, në përputhje me aktet ligjore dhe nënligjore në fuqi për këtë qëllim.

Neni 3

Livrimi, pranimi dhe transferimi i të drejtave

3.1 Shitësi, në përputhje me këtë kontratë duhet të programojë, të prodhojë e të shesë dhe blerësi duhet të programojë, të pranojë dhe të blejë të gjithë sasinë e prodhuar të energjisë elektrike në pikën e livrimit.

3.2 Shitësi është i detyruar të marrë masat e duhura të lidhë impiantin prodhuës të energjisë elektrike me pikën e lidhjes të përcaktuar, sipas specifikimeve dhe rregullave të përcaktuara në kodin e shpërndarjes, kodin e matjes dhe akteve të tjera.

3.3 Energjia elektrike do të transmetohet nga shitësi tek blerësi në pikën e livrimit, ku dhe pronësia e energjisë do të kalojë nga shitësi tek blerësi.

3.4 Blerësi do t'i paguajë shitësit sasinë e blerë të energjisë elektrike me çmimin e kontratës dhe sipas rregullave të përcaktuara në nenin 8 (faturimi dhe pagesa).

3.5 Blerësi bie dakord që të pranojë sasi të tjera shtesë të energjisë elektrike nga ana e shitësit, në rast të një prodhimi më të madh nga ky i fundit. Për këtë shitësi duhet të bëjë njoftimet përkatëse për t'i mundësuar blerësit marrjen e energjisë, si dhe rregullimin e programit të tij.

Neni 4

Dokumentacioni paraprak, tensioni, frekuenca

4.1 Shitësi do t'i verë në dispozicion/dorëzohë blerësit të gjithë dokumentacionin dhe të dhënat lidhur me testimet dhe transmetimin e energjisë, specifikimet teknike të gjithë pajisjeve elektrike të instaluar, përfshirë këtu edhe certifikatat e specifikimeve, detajet e matësve dhe pajisjeve të sigurisë të instaluar, 30 ditë përpara se impianti prodhuës të vihet në shfrytëzim të plotë e të fillojë prodhim/livrimin e energjisë.

4.2 Energjia elektrike duhet të livrohet me tension dhe frekuencë në përputhje me aktet ligjore dhe nënligjore në fuqi.

Neni 5

Programet e livrimit

5.1 Impiantet prodhuese me fuqi të instaluar mbi 5 MW duhet të programojnë dhe të paraqesin tek blerësi programet e livrimit, në përputhje me rregullat e tregut të energjisë elektrike.

5.2 Impiantet prodhuese me fuqi nën 5 MW do të paraqesin programin mujor/vjetor sipas sasisë së energjisë elektrike që parashikohet të prodhohet.

5.3 Devijimet nga programet e paraqitura do të trajtohen në përputhje me rregullat e tregut të energjisë elektrike apo çdo akti tjetër të miratuar nga ERE për këtë qëllim.

Neni 6

Matja e energjisë elektrike të livruar

6.1 Palët në këtë kontratë do të sigurojnë njëra-tjetrën se livrimet dhe pranimi i energjisë elektrike do të maten ose verifikohen me sistem matjeje, në përputhje me procedurat dhe standardet e përcaktuara në kodin e funksionimit të shpërndarjes dhe kodin e matjes së energjisë elektrike.

6.2 Matja e energjisë elektrike të livruar nga shitësi te blerësi do të kryhet në pikën e matjes/livrimit, e cila do të jetë në pronësi të shitësit, konform rregullave të përcaktuara në kodin e matjes së energjisë elektrike. Për përcaktimin e instalimit, mirëmbajtjes, kontrollit, testimit dhe vulosjes së sistemit të matjes së energjisë elektrike, palët i referohen kodit të matjes së energjisë elektrike.

6.3 Matësi kontrollohet, kolaudohet dhe vuloset në prezencë të personave të autorizuar të shitësit, blerësit dhe operatorit të sistemit të shpërndarjes. Kolaudimi kryhet në vende të autorizuar dhe certifikuar sipas kodit të matjes së energjisë.

6.4 Në ditën e caktuar nga palët në kontratë (ose në ditën e fundit të muajit përkatës), përfaqësuesit e autorizuar të shitësit dhe blerësit do të takohen për të lexuar aparatit matës të energjisë elektrike, që përcakton sasinë mujore të energjisë së livruar nga shitësi te blerësi çdo muaji. Tregimi i numërorit të matësit do të lexohet dhe regjistrohet çdo muaj për të realizuar kryerjen e bilancit të shitblerjes së energjisë elektrike. Në rast të mosfunksionimit të sistemit të matjes për shkak të defekteve, marrja e të dhënave do të përcaktohet me marrëveshje midis palëve duke iu referuar regjistrave të leximit të matjes.

6.5 Për leximin e matjes të realizuar sipas pikës 6.3 të këtij neni, do të mbahet një procesverbal (aktrakordim) i leximit të aparatit matës, që do të firmoset nga përfaqësuesit e autorizuar të palëve që kryejnë leximin, me përmbajtjen si më poshtë:

- a) Të dhënat e sistemit të matjes (aparati matës dhe transformatorët e matjes);
- b) Identitetin e personave që bëjnë leximin;
- c) Nënshkrimin e personave;
- d) Leximin e matësit për muajin paraardhës;
- e) Leximin aktual të matësit.

6.6 Në rastet kur përfaqësuesi i blerësit nuk paraqitet në datën e caktuar, shitësi do të kryejë procesin e faturimit konform rregullave në fuqi dhe do t'i dërgojë blerësit faturën. Blerësi është i detyruar të shlyejë vlerën e faturuar. Çdo paqartësi për saktësinë e faturës nga ana e blerësit, do të jetë objekt rishikimi dhe rregullimi në muajt e ardhshëm.

6.7 Blerësi duhet të mbajë në impiantet/instalimet përkatëse të prodhimit të energjisë regjistrin (manual) të leximit të matësit, i cili duhet t'i vihet në dispozicion për inspekte/testime përfaqësuesve të autorizuar të blerësit dhe pjesëmarrësve të tjerë të tregut që kanë akses ligjor.

6.8 Në çdo rast përfaqësuesit e autorizuar të furnizuesit publik me shumicë, në bazë të kodit të matjes dhe me cilësinë e blerësit të energjisë, mund të kryejnë inspekte dhe testime të sistemit të matjes dhe sistemet e tyre të regjistrimit. Punonjësi i impiantit përkatës do t'i vejë në dispozicion përfaqësuesve të FPSH regjistrin e leximit të matësit të energjisë elektrike dhe do t'i kryejë aksesin e nevojshëm për të kontrolluar sistemin e matjes.

6.9 Mbas instalimit të sistemit të matjes dhe regjistrimit të të dhënave online, shitësi është i detyruar të bëjë transmetimin e këtyre të dhënave, sipas këtij sistemi, përveç rasteve të pamundësive teknike për montimin e sistemit online të matjes.

Neni 7

Dokumentimi i procesit të livrimit/pranimit dhe matjes

7.1 Sipas një kërkesë të arsyeshme, palët:

a) do t'i sigurojnë njëra-tjetrës dokumentacionin që posedojnë, i cili evidenton sasitë, livrimet dhe pranimet e energjisë elektrike për qëllimet e përcaktimit të masës dhe shkakut të çdo devijimi nga programet;

b) do të kërkojnë nga operatori i sistemit të shpërndarjes dhe do të ndajnë mes tyre çdo dokumentacion shtesë të nevojshëm për të verifikuar mospërputhjet mes flukseve të programuara dhe reale të energjisë elektrike.

7.2 Nëse njëra palë, me kërkesë të palës tjetër, ose për të zgjidhur një mosmarrëveshje të ngritur nga pala tjetër, kryen shpenzime të arsyeshme të jashtme, për të verifikuar nëse pala tjetër ka dështuar të përmbushë siç duhet detyrimet e saj sipas termave të kësaj kontrate, këto shpenzime do të rimbursohen nga pala që nuk ka përmbushur detyrimet, nëse kjo kërkohet.

Neni 8

Faturimi dhe pagesa

8.1 Fatura; Shitësi do t'i dorëzojë blerësit për livrimin e energjisë elektrike një faturë sipas formatit dhe standardeve që kërkon legjislacioni në fuqi, e cila paraqet sasitë totale të energjisë elektrike të shitur prej tij në muajin kalendarik paraardhës. Paraqitja e kësaj fature do të bëhet brenda datës 10 të muajit pasardhës (ose kur kjo datë është pushim zyrtar, ditën e pasardhëse të punës). Krahës faturës, shitësi do t'i dorëzojë blerësit edhe aktrakordin përkatës të mbajtur me përfaqësuesit e operatorit të sistemit të shpërndarjes.

8.2 Pagesa; Blerësi do t'i kryejë pagesën shitësit kundrejt vlerës së faturës mujore. Pagesa do të bëhet brenda 30 ditëve nga dita e pranimet të faturës nga blerësi. Data e pagesës do të konsiderohet data që nga llogaria e blerësit preken fondet monetare.

8.3 Vonesa në kryerjen e pagesës; Nëse blerësi dështon në kryerjen e pagesës brenda afatit të përcaktuar në këtë kontratë, shpërblimi për dëmet e shkaktuara si rezultat i vonesës, konsiston në pagimin e kamatëvonesës në masën e normës së interesit të bonove të thesarit me maturim 1- vjeçar +0.5% në vit për çdo ditë vonese të llogaritura nga data në të cilën do të kryhej pagesa. Kamatëvonesa paguhet pa qenë i detyruar kreditori (shitësi) të provojë ndonjë dëm. Në llogaritjen e kamatëvonesës nuk përfshihet data kur kryhet pagesa.

8.4 Shumat e diskutueshme; Për çdo pretendim që lidhet me saktësinë e faturës, do të jepet një shpjegim me shkrim nga shitësi ose blerësi dhe korrektimet në faturë do të bëhen vetëm brenda muajit të faturuar, në të kundërt do të paguhet shuma e faturuar jo më vonë se data e afatit të pagesës dhe diferencat (shtesat apo pakësimet) nga korrektimet do të reflektohen në muajt pasardhës.

Neni 9

Detyrimet mbi taksat dhe tatimet

9.1 Palët janë përgjegjëse për përmbushjen e detyrime që lidhen me të gjitha tarifat, taksat, tatimet sipas legjislacionit në fuqi.

9.2 Shitësi do të paguajë të gjitha detyrimet lidhur me taksat, tatimet apo çdo detyrim tjetër sipas legjislacionit në fuqi në ose/dhe para pikës së livrimit dhe blerësi do të paguajë të

gjitha detyrimet lidhur me taksat, tatimet apo çdo detyrim tjetër sipas legjislacionit në fuqi pas pikës së livrimit.

Neni 10

Risku dhe humbja

10.1 Palët në fillim të çdo viti do të hartojnë dhe do të koordinojnë programet e remonteve të planifikuara, si dhe shërbimet për centralin dhe të linjave dhe pajisjeve elektrike të sistemit të shpërndarjes.

10.2 Shitësi do të përballojë të gjitha risqet shoqëruese dhe do të jetë përgjegjës për çdo kosto ose pagesë të imponuar që lidhet me programimin, transmetimin dhe livrimin e sasisë së energjisë elektrike të kontraktuar deri në pikën e livrimit, në përputhje me rregullat e tregut të energjisë elektrike dhe akteve të tjera në fuqi, përveç rastit kur livrimi i energjisë është i pamundur si rezultat i rrethanave që nuk varen nga shitësi ose në rast se moslivrimi justifikohet nga riparimet vjetore dhe mirëmbajtjes sipas pikës 1 të këtij neni.

10.3 Blerësi do të përballojë të gjitha risqet shoqëruese dhe do të përgjigjet për çdo kosto ose pagesë të imponuar që lidhet me pranimin dhe transmetimin e sasisë së kontraktuar pas pikës së livrimit, përveç rastit kur moslivrimi i energjisë është i pamundur, si rezultat i rrethanave që nuk varen nga blerësi (forcë madhore) ose në rast se moslivrimi justifikohet nga avaritë në linjat dhe pajisjet elektrike të operatorit të sistemit të shpërndarjes.

Neni 11

Çmimi

11.1 Blerësi paguan shitësin për energjinë elektrike të blerë, me çmimin e miratuar, nga ERE.

11.2 Çmimi i aplikueshëm në momentin e lidhjes së kësaj kontrate është çmimi në fuqi i miratuar nga ERE.

11.3 Nëse ERE miraton një çmim të ndryshëm nga ai i aplikuar sipas paragrafit 11.2 palët do të bëjnë korrigjimet e nevojshme për sasitë e faturuara në përputhje me vendimin përkatës së ERE-s.

Neni 12

Forca madhore

12.1 Në qoftë se secila palë përballlet me forcën madhore, ajo do të njoftojë palën tjetër pa vonesë nëpërmjet një njoftimi me shkrim të konfirmuar si e marrë nga pala tjetër, duke i bërë të qartë kësaj të fundit natyrën e ngjarjes, kohëzgjatjen e mundshme dhe pasojat e pritshme.

12.2 Asnjëra palë nuk do të konsiderohet përgjegjëse për mospërmbushje të detyrimeve kontraktore, në qoftë se ajo ka qenë penguar për realizimin e tyre nga forca madhore.

12.3 Palët do të ndërmarrin masat e nevojshme për të reduktuar minimalisht dëmet.

Neni 13

Kompensimet për mospranimin e energjisë elektrike

13.1 Kur blerësi nuk përmbush detyrimin për të pranuar energji nga shitësi sipas kësaj kontrate, dhe kur një mospërmbushje e tillë nuk justifikohet nga një rast i forcës madhore, atëherë blerësi duhet të kompensojë shitësin për dëmin financiar të shkaktuar, të barabartë me produktin sasisë së energjisë të papranuar me çmimin e rregulluar nga ERE, në fuqi.

13.2 Shuma e paguar në përputhje me këtë nen, do të faturohet dhe paguhet sipas nenit 9 (faturimi dhe pagesa).

13.3 Asnjëra nga palët nuk do të jetë e detyruar të kompensojë humbjet e palës tjetër si rezultat i riparimeve apo mirëmbajtjes (përfshirë këtu edhe riparimet e urgjencës) të realizuara në

përputhje me programin e rënë dakord nga palët.

Neni 14

Përfundimi i kontratës

14.1 Palët kanë të drejtë të përfundojnë kontratën, në qoftë se reciprokisht bien dakord për këtë gjë. Palët njoftojnë ERE-n brenda 5 ditësh për përfundimin e kontratës.

14.2 Në qoftë se gjatë periudhës së vlefshmërisë së kontratës secila Palë vëren një shkelje serioze të detyrimit kontraktor nga ana e palës tjetër, menjëherë do ta njoftojë këtë të fundit me shkrim lidhur me këtë.

14.3 Pala tjetër brenda një afati kohor prej 10 ditësh nga marrja e njoftimit duhet të ndreqë ose kompensojë shkeljen e pretenduar të detyrimit kontraktor ose në rast të mospajtit lidhur me pretendimin do t'i shprehë palës tjetër me shkrim këtë mospajtim duke përcaktuar në të edhe argumentimet e veta për këtë.

14.4 Në qoftë se brenda afatit 10-ditor si më sipër nuk është bërë ndreqja apo kompensimi i shkeljes kontraktore ose pala që ka bërë shkeljen nuk i ka shprehur palës tjetër mospajtimin me shkrim brenda këtij afati, atëherë pala që pretendon shkeljen mund të kërkojë zgjidhjen e njëanshme të kontratës.

14.5 Palët do të kenë të drejtë të kërkojnë përfundimin e kontratës në mënyrë të njëanshme, në qoftë se ato nuk janë në gjendje të përmbushin detyrimet kontraktore sipas kësaj kontrate për një periudhë kohore pa ndërprerje më shumë se 6 muaj si rezultat i forcës madhore.

14.6 Palët kanë të drejtë të kërkojnë përfundimin e kontratës kur:

a) Njëra nga palët falimenton ose nuk është në gjendje të paguajë borxhet ose dështon, ose pranon me shkrim paaftësinë e saj të përgjithshme për të paguar borxhet kur duhet;

b) në rast se njëra nga Palët ka dhënë garanci jokorrekte dhe të pavërteta;

c) në rast të shkeljes nga ana e palëve të rregullave dhe kërkesave teknike të parashikuara nga aktet nënligjore në fuqi.

14.7 Përfundimi i kontratës sipas paragrafëve 14.4,14.5,14.6 të këtij neni bëhet me miratimin e ERE-s.

14.8 Palët do të llogarisin brenda 30 ditëve pune duke filluar nga dita e përfundimit të kontratës, detyrimet financiare respektive dhe mënyrat e shlyerjes së tyre.

Neni 15

Afati i kontratës

15.1 Kjo kontratë do të jetë në fuqi për një periudhë 15 (pesëmbëdhjetë) vjeçare.

Neni 16

Hyrja në fuqi

16.1 Kjo kontratë, dispozitat e të cilës janë miratuar nga ERE hyn në fuqi pas nënshkrimit të saj nga palët.

Neni 17

Ndryshimet

17.1 Në qoftë se ndonjë term, kusht apo rregull i kësaj kontrate do të bëhet i pavlefshëm, i paligjshëm ose i pazbatueshëm plotësisht apo deri në njëfarë mase, ky term, kusht apo rregull nuk do të sjellë pavlefshmërinë, paligjshmërinë apo pazbatueshmërinë e kushteve, termave dhe rregullave të parashikuara në pjesën tjetër të kësaj kontrate.

Neni 18

Legjislacioni

18.1 Kontrata për shitblerjen e energjisë elektrike do të bazohet dhe interpretohet në përputhje me legjislacionin e Republikës së Shqipërisë.

Neni 19
Njoftimet

19.1 Çdo njoftim i dhënë nga njëra palë tjetër sipas kontratës duhet të bëhet me shkrim në adresën e specifikuar në kontratë.

19.2 Njoftimi do të ketë efekt sapo të dorëzohet.

Neni 20
Zgjidhja e mosmarrëveshjeve

20.1 Në rast të mosmarrëveshjeve, blerësi dhe shitësi do të bëjnë fillimisht përpjekje të zgjidhin konfliktin me mirëkuptim. Nëse palët nuk gjejnë mirëkuptim, ato mund të kërkojnë ndërhyrjen e ERE-s.

20.2 Palët në çdo rast kanë të drejtën e zgjidhjes së konfliktit në rrugë gjyqësore ose në arbitrash sipas përcaktimeve të bëra nga vetë palët. Gjykata kompetente për zgjidhjen e mosmarrëveshjeve midis palëve, që rrjedhin nga kjo kontratë do të jetë Gjykata e Rrethit Gjyqësor, Tiranë.

Neni 21
Personat përgjegjës (administratorët) të kontratës

21.1 Secila palë do të caktojë në këtë kontratë personin që do të jetë përgjegjës, për interes të palës respektive, për kryerjen e komunikimeve përkatëse dhe për përfaqësimin e saj në problematikat që lidhen me ekzekutimin e kësaj kontrate.

21.2 Secila palë do të njoftojë menjëherë palën tjetër për ndonjë ndryshim lidhur me personin e caktuar përgjegjës. Nëse ndonjëra nga palët nuk bën informimet e duhura, atëherë pala do të marrë mbi vete të gjitha përgjegjësitë lidhur me ndonjë dëm të mundshëm që rrjedh si rezultat i mosdhënies së informacionit të nevojshëm.

21.3 Personat përgjegjës të kësaj kontrate për palët, sipas paragrafit të parë të këtij neni, do të jenë respektivisht:

Për blerësin _____

Për shitësin: _____

Neni 22

Kjo kontratë hartohet në 4 kopje të barasvlefshme nga të cilat 2 kopje qëndrojnë në KESH sh.a. (FSHP) dhe 2 kopje i mban shitësi.

Për shitësin
Emërtimi juridik i palës
Personi _____ i _____

Për blerësin
KESH sh.a.(FSPH)
autorizuar _____ i _____ palës

Funksioni: _____
Nënshkrimi _____ dhe _____ vula _____